

Tipsernermit lottornermillu iluanaarutinit agguaassisarneq pillugu Inatsisartut inatsisaat

Kapitali 1

Agguaanneqartarnerat

§ 1. Pinnguaatit, eqqorniaasitsinerit eqquiniunnerillu ilaat pillugit inatsit naapertorlugu pissarsiassat ukiumoortumik Kalaallit Nunaannut pisassanngortinneqartartut Naalakkersuisut tamanut iluaqutaasussamik siunertanut makkununga agguaatissavaat:

- 1) 50%-ii timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1%-ii piukkunnaatillit pikkorinnerillu timersornerinut,
- 3) 13,6%-ii meeqqat inuusuttullu peqatigiiffiitut, aamma
- 4) 27,3%-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarneermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissamik siunertanut aamma tamanut iluaqutaasussamik ilisimatusarniarluni siunertanut.

Imm. 2. Aningaasat Kalaallit Nunaanni tipsernermit lottornermillu naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorineqarsinnaapput.

Imm. 3. Naalakkersuisut aningaasaateqarfinnut suliniaqatigiiffinnullu allanut tipsernermit lottornermillu iluanaarutinit tamanut iluaqutaasussamik siunertanut agguaassisartunut imm. 1-imi taaneqartut tamanut iluaqutaasussamik siunertanut tapiissuteqartoqarsinnaatillugu ani-ngaasanik tunissuteqarnissaq pillugu isumaqatigiissuteqarsinnaapput. Aningaasanik tunissutissatut isumaqatigiissutigineqartut pissarsiassanit ukiumoortumik Kalaallit Nunaannut pisassanngortinneqartunit imm. 1-imi taaneqartut agguaassisoqartinnagu ilanngaaticigineqassapput.

§ 2. Atugassanngortitat § 1, imm. 1-imi taaneqartut imatut agguaanneqassapput:

- 1) Atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguasseqqinnermik isumaginnittussamut agguaanneqassapput.
- 2) Atugassanngortitat § 1, imm. 1, nr. 2-mi taaneqartut Team Grønlandimut, piukkunnaatillit pikkorinnerillu timersornerinut agguasseqqinnermik isumaginnittussamut agguaanneqassapput.
- 3) Atugassanngortitat § 1, imm. 1, nr. 3-mi taaneqartut Sorlammut, meeqqat inuusuttullu peqatigiiffiitut agguasseqqinnermik isumaginnittussamut agguaanneqassapput, aamma
- 4) Atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalakkersuisunit agguaanneqassapput.

Imm. 2. Imm. 1, nr. 1-3-mi atugassanngortitat taaneqartut agguateqqinneranni allaffissornikkut aqutsineq Naalakkersuisut tigusinnaavaat imatut pisoqartillugu:

- 1) Soqutigisaqaqatigiiffiup Naalakkersuisut taamaaliortoqarnissaanik kissaateqarfigippagit.
- 2) Pingaarutilimmik aalajangersimasumillu tunngavilersukkamik soqutigisaqaqatigiiffik suliasaminik isumaginnissinnaajunnaarsorineqalerpat.

Kapitali 2

Suliasat suliarineqartarnerat tapiiffigineqarnissamullu piumasaqaatit

§ 3. Pisortat ingerlatsineranni suliasat suliarineqartarnerat pillugu Inatsisartut inatsisaanni pisortat ingerlatsineranni tamanut saqqummiussisussaataaneq pillugu inatsisartut inatsisaanni aammalu Inatsisartut Ombudsmandiat pillugu inatsisartut inatsisaanni aalajangersakkat § 2, imm. 1, nr. 1-imiit 3-mut soqutigisaqaqatigiiffinnut taaneqartunut atuupput taakku Inatsisartut inatsisaat manna taannalu malillugu malittarisassat atuuttussanngortinneqartut naapertorlugit Naalakkersuisut sinnerlugit aalajangiinissamut piginnaatitaaffilerneqarsimappata.

§ 4. Inunnut nunami maani najugaqartunut imaluunniit peqatigiiffinnut, soqutigisaqaqati-giiffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

Imm. 2. Imm. 1-imi aalajangersagaq apeqqutaatinnagu Team Grønland inunnut Kalaallit Nunaata avataani najugalinnut tapiissuteqarsinnaavoq tapiissutisissat Naalakkersuisunit timersornermut piukkunnaatilitut imaluunniit timersortartutut pikkorinnertut akuersissutigineqarsimappata.

Imm. 3. Imm. 1-imi aalajangersagaq qanorluunniit ikkaluarpat Avalak tapiiffigineqarsinnaassaaq.

Kapitali 3

Nakkutilliineq

§ 5. Soqutigisaqaqatigiiffiit § 2, imm. 1, nr. 1-imiit 3-mut taaneqartut kingusinnerpaamik 1. juunimi Naalakkersuisunut ukiumut naatsorsuuteqarfiusumut qaangiuttumut naatsorsuutitik kukkunersiorneqarsimasut naatsorsuutinullu atortussat allat nassiutissavaat. Naatsorsuutit ukiumi qaammatisiuteqarfiusumi qaangiuttumi atugassanngortinneqartunit agguanneqarsimasut naatsorsuutaannik kukkunersiuisumit naalagaaffimmit akuerisaasumit imaluunniit nalunaarsorneqarsimasumit atsiorneqarsimasunik ilanngussivigineqassapput.

Imm. 2. Naatsorsuutit, naatsorsuutitut atortussat allat naatsorsukkallu imm. 1-imi taaneqartut piffissaq eqqorlugu tiguneqanngippata, imaluunniit Naalakkersuisut paasippassuk tipsernermit lottornermillu iluanaarutit siunertanut naapertuuttumik, § 1, imm. 1 takuuk, atorneqanngitsut, Naalakkersuisut tipsernermit lottornermillu iluanaarutinit soqutigisaqaqatigiiffinnut siunissami akiliutigineqartussat kinguartissinnaavaat naatsorsuutit, naatsorsuutitut atortussat allat naatsorsukkallu nassiunneqareerserlugit imaluunniit tipsernermit lottornermillu iluanaarutit siunertanut naapertuuttumik atorneqarnissat isumannaarneqareerserlugu. Naalakkersuisut akiliutigineqartussat kinguartinneqarnerannut atatillugu atugassanngortinneqartunik agguasseqqittarnerup allaffissornikkut aquunneqarnera tigugallarsinnaavaat.

§ 6. Tapiissutisartut soqutigisaqaqatigiiffillu § 2, imm. 1, nr. 1-imiit 3-mut taaneqartut piumaffigineqarnermikkut paasissutissat atorfissaqartinneqartut tamaasa Naalakkersuisunut

nassiuttassavaat, taamatuttaaq qinnuteqaatit, aalajangiinerit, agguaassinnermut najoqqutassat, ilaasortat amerlassusiat, akiliutit il.il. pillugit paasissutissat.

§ 7. Tapiissutigineqartut tamakkiisumik ilaannakuusumilluunniit utertillugit akileqquneqarsinnaapput, qinnuteqaateqartoq eqqunngitsunik paasissutissiisimappat, tapiissuteqarnissamut piumasaqaatit naammassineqarsimanngippata imaluunniit suliarineqartartut sinneqartoorutaasimappata.

Kapitali 4

Piginnaatitsissutit

§ 8. Naalakkersuisut qinnuteqaatinut piumasaqaatit pillugit erseqqinnerusunik malittarisassanik aalajangersaasinnaapput, taamatuttaaq qinnuteqaatit suliarineqassappata piumasaqaataassasoq qinnuteqaateqartut uppersaatissanik saqqummiussissasut tassaasunik pilersaarutit allaaserineqarnerinik, missingersuutinik, ilaasortat amerlassusiinik, suliasatut pilersaarutinik assigisaannilluunniit.

Imm. 2. Naalakkersuisut naatsorsuutinik tunniussisarneq pillugu erseqqinnerusunik malittarisassanik aalajangersaasinnaapput, tassunga ilanngullugu allat § 2, imm. 1, nr. 1-imiit 3-mut soqutigisaqaqatigiiffit taaneqanngitsut naatsorsuutinik saqqummiussissasut, tipsernermit lottornermillu iluanaarutinik pissarsisimagunik.

Imm. 3. Naalakkersuisut tipsernermit lottornermillu iluanaarutinik agguaassisarneq pillugu paasissutissiisarnermut tipsernermit lottornermillu iluanaarutinik atuisarneq pillugu erseqqinnerusunik malittarisassanik aalajangersaasinnaapput.

Imm. 4. § 2-mi imm.1, nr. 1-3 naapertorlugu naalakkersuisut kattuffinnit taakkartorneqartunit tapiissutinik agguaassinnermi aalajangersakkat pillugit maalaarutinik suliaqarnissamut atatillugu malittarisassiorsinnaassapput.

Kapitali 5

Atuutilerfia

§ 9. Inatsisartut inatsisaat 1. juli 2006-imi atuutilerpoq.

Imm. 2. Inatsisartut inatsisaata atuutilerneratigut tipsernermit lottornermillu iluanaarutinik agguaassisarneq pillugu Inatsisartut inatsisaat nr. 13, 11. novembari 2000-imeersoq atorunnaarsinneqarpoq.

Imm. 3. Malittarisassat, tipsernermit lottornermillu iluanaarutinik agguaassisarneq pillugu Inatsisartut inatsisaat nr. 13, 11. november 2000-imeersoq najoqqutaralugu aalajangersarneqartut atuutiinnassapput matumani imaluunniit Inatsisartut inatsisaanni allani inatsisinik tun-ngaveqarluni malittarisassatigut aalajangersarneqartutigit taarserneqarnissamik atorunnaarsinneqarnissamilluunniit tungaanut.

Namminersornerullutik Oqartussat, ulloq 1. juni 2006

Hans Enoksen

/

Doris Jakobsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut